

四庫全書

集部

欽定四庫全書

丹陽集卷二十二

宋 葛勝仲 撰

七言絕句

讀史八首

王嘉

王嘉寃死有由緣峻節忠言照史篇最是一條堪恨處
臨刑猶道孔光賢

馬融

為梁草奏枉忠臣李固黃緣遂殺身南郡何須施絳帳
應無面目見時人

陳蕃

闕尹流凶徧海隅飛章露奏計誠疎黃門詔獄空忠鬼
天下何因遂掃除

鄧伯道

賊掠家儲歲阻饑將兒繫樹後無兒林回輕棄千金壁
始信皇天是有知

法真

獎鑒人倫重法真
親庭曾遺助人牖
間占察曾何補
只得庸庸番土臣

王戎

兒時黠慧豈尋常
苦李徒教結道傍
何事季年癡更甚
為財鑽核長膏肓

沈約

革運稱梁出秘謀
壽光不許范雲留
赤章夜奏稱非已

合向人間謚隱侯

王維

子昂文律唱唐家
摩詰詩聲未易加
場屋有誰深薦達
坐令入轂賴琵琶

泮水

半壁清波勢自然
鸞聲旂色想當年
野芹不識興亡恨
猶自牽風漾碧漣

廟宅

素王遺廟屋渠渠老檜陰濃耀碧虛無復升堂聞古樂
尚傳開甕得丹書

靈光故基

蟠螭宛轉謾承楹東序西廂只廢基終與建章同圮壞
浪言神力有支持

望嶽亭

迤邐羣山不識名天門日觀遠崢嶸地靈不見二宮迹
聖作時聞萬歲聲

壽慶二丘

巍巍寶甃聳青冥軒后開基向此生雲瑞已隨仙馭遠
電光猶繞北樞明

省習堂偶題

格外官曹自在身闔門掃軌養天真何須更待年三十
始約孤高不諳人

蒙文中縣丞以詩送苦笋走筆六首為謝

豹皮羊角食無冤煩助先生苜蓿槃便教佐饗淹苦酒

春餘調筆要多酸

張衡愁坐政煩寃
下筋南烹炤午槃
老作禪癡多不肉
每觀齏餼鼻辛酸

爨無煙火歎厨貧
嘉穀蒙頒勝八珍
苦口片時終雋永
端如藥石盡規人

茂林髡取未應貧
政恐書材窘伯珍
更請作橋通夜盜
可憐辛苦涉溝人

公園荒涼此物無
畦丁遣餉十餘枝
他年京下憎羊酪

莫忘溪亭點酒時

碧潤那憂盛夏無駢頭聊取供齋枝辟疆園暗新蒼玉
未害青柯貫四時

四月八日蒙文中餉黑飯作詩二首紀謝

熱際初經四月八磨香灌佛曉泉寒丞公忽致槃游飯
兒輩驚看歡喜丸

方歎流塵生范甌何圖香黍溢顏輦將軍尚未封侯貴
推去那容學井丹

比作黑飯新茶二首未蒙文中縣丞寵和走筆
再賦以助一笑

點漆飯蒙清淨供翻匙那敢配羊寒獨欣法味盈齋鉢
尚欲詩辭看彈丸

三歎屬厭闔沒腹十方皆滿淨名箬定中不敢逃禪飯
早景何因醉臉丹

次韻張仲宗元幹絕糧五絕

高賢往往突不墨造化從來一小兒執戟逐貧曾有賦

柴桑乞食豈無詩

二頃無田空好歲
四郊多壘已仍年
遙知壁立書生舍
只有溪藤與麝煙

飄蓬聞說旅塗窮
我有枯魚困轍中
裹飯獨期來見客
一杯當卜與君同

冠玉何因常甕牖
身名未泰少安之
雀羅忽枉黃金彈
驚怖還應震失匙

中臺宏議裨初政
學省雄文畏後生
不悟宦遊成左計

只今無米糝藜羹

從仁叔求楷笏四首

異種初從弟子栽東家宰木鬱泉臺誰知當日勤封植
只作人間手板材

好事頻求闕里堂文房裁斲已盈床講郎乞與非拋却
已辦芬絲結紫囊

橫斜文理秀爛斑分餉閒官尚獨慳準擬遣人來檢料
欲將拄頰望西山

祇召行親尺五天書辭對命赤墀前人言此板多乖牾
換試聊須覓楮淵

陪亞仲遊習家池不攜妓偶作二首

史君攜客習池頭不載連營女妓遊紅燭要須醉薊澤
白雲何似老溫柔

四序垂楊裊麴塵荆豪不見水粼粼何須倒載搖鞭問
不是并州姓葛人

少蘊內翰示和朱氏新治澗泉之什依韻和兩

絕

桐川舊傳七里瀨
洛宅仍誇八節灘
樓聳橋橫隨波影
未應能勝此山間

北門學士居新卜
南海使君家在中
更有嬌雲兼健水
吾邦從此冠玲瓏

次韻叔才見貽二首

舟隨風入亂山村
流水桃花似武陵
疊穎叢條煩寄語
幸非逋客莫相憎

紛紛寵辱不勞驚凜凜孤高未易名聞有百錢供菜把
下簾從此謝君平

尋山

檻泉依石古名馗細轉輕流有令姿不覺籃輿歸日暮
坐憐清泚住多時

山臺

休言歌酒舊時好把酒高歌今更新醉裏不知身是客
寒城落日數行人

鳳凰山泉石勝絕去城無幾里而前此未有知者偶因休吏與文中良器二士訪尋得壞竒卓絕之觀於荆棘草莽間相顧大笑因崇基趾築亭榭疏泉甃池為登臨嘯詠之地九月二十五日游陟歸夜作小詩十首

鳳凰山色鳳凰泉山下泉邊有隱仙同是荒榛埋沒久一朝題目萬人傳

渾渾泉源瀉一溪碧漣方沼燭鬚蒼使須牽率諸君賀

却向山中得鳳池

結宇南溪領老潛東亭復構半空簷書棋文義慚朱异
獨向雲山號不廉

暝靄昕霞景變移煙雲竹樹眇參差軟紅塵裏何因有
遷謫江湖卻恨遲

竹好祇生君子國松高不受大夫名兩郎風韻都相似
結作東南四友生

濃淡峯巒低復高林深依約見汀橋風流公子圖紈扇

咫尺須論萬里遙

鳳去丹山久不歸
昔年曾此覽朝暉
紫庭正帶黃紳望
曷日重將九子飛

從我登山未覺疎
應將得失日乘除
喜添桐葉千篇詠
顧減茅堂一卷書

陰森行盡古榕林
別有幽竒路可尋
漁舍傍溪人不見
弄晴水鳥自浮沈

消盡機心獨保真
無情雲外合相親
安心丈六竒礮石

不是山間射虎人

再賦十絕

橫肱盤石俯清泉
山澤臞儒似列仙
泛水登山聊肆志
著書萬卷果誰傳

檻泉甘美勝梁溪
來照泓澄得展眉
晷盡道潺湲流不遠
那知無路到天池

子亭聊欲寄幽潛
旋斲茅茨覆短簷
北牖未妨施枕簟
炎天坦腹卧飛廉

雲峯遙看步慵移層碧三叅更兩差天際餘霞似殘錦
只堪收拾餉丘遲

兩士端如蕭子顯求心已足不干名春朝秋夕風兼月
辭藻居然嗜此生

雲蓬煙艇寄孤高破浪乘風不礙橋豈待征夫問歸路
始教輕漾日遙遙

眺望雲巖每惜歸溶溶溪練照斜暉雙鳧容與還如我
因戀滄洲更不飛

清新十詠豈才疎
俗韻蕪詞盡
掃除佳句浪傳真
可惜
郊居齋壁莫輕書

軟語相從喜道林
碧流紫樹日幽尋
是非那復談朝士
懶作香方比麝沈

蠟珠作鳳定非真
真鳳惟梧與竹親
鳳去臺空應不恨
賦詩同有謫仙人

走筆再和鳳凰山十韻
酬良器解元兼呈文中

宣德

洞府桃花出汎泉只容劉阮見飛仙叢條疊穎嫌逋客
好去人間莫浪傳

不甘蒿藿蔽流溪混沌何妨一畫著若遣周四挿楊柳
醴泉便是陸家池

隱吏皆非謾誨潛夜燈花落廣文簷招尋月月攜連璧
不用船中覓孝廉

屈曲雲根屋旋移下窺鴛瓦碧參差不須欲速求僂路
自地升天理合遲

雲巘回環出遠青
千層萬疊莫知名
白茅峯獨如黃憲
不見須臾鄙吝生

催功下下與高高
束火人歸鬧小橋
莫向九嵒生妄見
須知采栢望中遙

灘聲留客不容歸
更盡西山一寸暉
要看冰輪升紫磨
遶枝寒鵲自驚飛

秋殘景物更蕭疎
愁寄憂埋盡破除
埃壘是中無少分
畫塵終恐誤君書

聞有山房隱茂林，高人不與世相尋。
屋虛但有荒基在，恐是宜僚遁陸沈。

結友忘懷契道真，水雲情話似親親。
愛君葉落雲飛句，知是才高壓衆人。

送靈浩赴江州般若之請三首

甚深真諦不容聲，溢水鑪峯照坐明。
悟般若人居般若，鐘魚都是妙香城。

峴山峯頂五花堂，曾見迷津賴法航。
雲水江流同一滴。

未妨作戲更隨場

師今此去幾時回是法初無去與來一句但言無可得
寶函封印不須開

贈僧知先

諸方行盡夙心諧澄碧歸來寄雅懷
曾識禪那兩居士
昭文齋主與高齋

庵僧善能求詩贈二絕句

此生任運只騰騰聊作空山骨
觀僧生死由來如幻夢

道人因此識三乘

一瓶一鉢早周游
參遍雲門與趙州
卷席歸家只趺坐
了無一法可推求

靈山紀遊

慣穿蒼翠屬潺湲
來伴高僧半日閒
鷲嶺談經元未散
不應向此認靈山

寄次顏叔時為蘇州庾官

遶郭清蒿翠欲浮
燕泉山水抱城流
娃宮香徑終肥膩

誰道蘇州勝汝州

題龍興寺顏魯公祠二首

幻界當年暫陸沈
聊憑剪綵結知音
清貧雖乏生前米
飛裂還多死後金

平原高節映常山
生死興亡本自天
莫道排墻為鬼錄
請看裂鐵作形仙

友卿病起二絕句

相從天末慰羈愁
屬疾書窓喜頓瘳
休向友卿求竟論

且從吳客話詩籌

遠來著錄寧非黠肯作長齋却是癡別久相懷應少廣
朝來新得字如龜

遊徑山蘊常上人字無可以山中秋日十詩求

和因次韻

年大飄零馘已黃野麋難復廁駕行山名一徑通天目
便欲看雲老是鄉

幽尋連日至如歸款聽清談木屑霏好乞一庵容一社

只消枳落與松扉

棘蓬禪老舌縱橫小閣談
元夜氣清頓覺心空重及第
信知茲理本無生

五峯齒萃勢縈迴國一當年
手自開莫向蘭袍認遺像
此心無去亦無來

攀條葉脫驚徂歲照影波清
悵病顏好似蘭臺感秋客
送歸臨水與登山

嚴除賓館遠相迎挂壁殘缸
夜自明卧聽秋聲鳴索索

華鯨呼粥報參橫

昂霄杉桂不知年
風燾雲幢鎖暮煙
狡獪老欽能縮地
十洲移得別山川

貞龍徙舍走風雲
寒井猶餘舊漲痕
老去文書但遮眼
懶求寒澗洗眵昏

擁書齋館水侵門
當日靈芝秀一村
碧落二卿今不見
空餘喬木曉驚猿

萬疊山深顯氣清
泠瀲天宇鴈初橫
真機已契偏中正

世事聊將熟處生

次韻劉無言

燾

山中五絕句敢請諸僚和之

載酒陶春久不歸將花判斷定忘疲尋芳便作而今計
莫待他年子滿枝

命友登山共寄情亦逢佳處便班荆有時便取琴雙瑣
寫出蒼髯夜半聲

蕭閒谷飲更巖棲應笑癡人薄領迷萬頃青油行省筋
嬾黃輕拂柳條低

川原紅綠遠交加
春物關心夢到家
體骨素輕惟燕子
面皮最好是桃花

榮槁如環浪自循
一筇雙屐伴行春
溪翁野老來爭席
不識蓬山第一人

遊真意亭得二絕句示良器

相攜取意踏郊墟
松拂芒鞋畢景俱
洒落持君比佳竹
幽人一日不堪無

清波澄澈復縈紆
照影湘纓得自娛
寄語溪光容笑傲

人愚那敢便相愚

嘲淵明

粟貯瓶中能幾何
頭巾漉酒苦無多
雖然清操標千古
試問還曾醉飽麼

中庭雙柏

羞為趙瑩婆娑樹
懶作虔徊旌節花
獨立凜然霜雪裏
惟將直節勸無邪

約特進河東相
公元樞河南相
公遊菁山觀梅

用前韻重賦五絕

獨抱幽真歲月長，不甘取次為人芳。
紫樞黃闥垂青眼，宿蘂橫枝特地香。

嚼蘂攀條趁日華，懸憂面旋逐風斜。
若非鼻觀通清馥，應道漫天無蒂花。

蔽谷連山萬樹多，吳天今日驟晴和。
冰肌玉骨知誰似，

只向尊前許兩娥。

原注河東相公
是日出二姬

為愛寒英暫去家，不辭溪路渺津涯。
山村盛事人應說，

第一人觀第一花

春醪香旨約同嘗
玉雪花多獨此疆
敢請對花同爛醉
擬將酒債典衣償

以梅花餉富季申直柔樞密有詩三首謝次其

韻

數枝幽艷逼人清
望臘先馳淡日程
往近樞光增嫵媚
絕勝寒影照溪明

姑射肌膚獨占清
東南萬樹數烏程

原注著林
隸烏程

便須挈

檣連宵賞要看瓊蕤伴月明

葛山庵畔野梅清風便猶須半日程聞說數枝來几席
何妨先賞到黎明

次韻胡汝明

舜陟梅花下小飲三首

林間縞袂綴瑤英月裏輕盈畫不成拂石坐來花一眼
神膚從此喜雙清

南枝連夜犯寒開好事誰曾步屨來上客固知心匪石
為花燒燭耻瓶罌

輕陰池館潤無塵骨醉簪花任笑人先向孤芳一傾倒
明朝更浥上都春

汝明以詩謝餉菊次韻二首

千本黃花嫩色深恍疑春色變家林禪翁護戒新停酒
小宴無因費百金

和氣凝陽更遞通露根移得自蠶叢分明般若圓明相
誤落柴桑酒盞中

二聖圖書

宸章端與三墳並奎畫全將六義該湖海小臣如草木
豈知雲漢有昭回

夢良以書獻吉夢戲作二絕

山林臯壤樂無厭况是寒灰豈復炎蹇足上天無是理
固應此夢不須占

枕中佳兆遠相誇未敢憑虛便拜嘉若去定心如止水
不隨閒夢入人家

書懷二首

寂寂蓬門雀可羅不妨休影養天和
詣人三十已當止
年事那堪更倍過

樗散知非濟世賢一官明道又踰年
真人上界官都足
甘向塵寰作散仙

雪意

閨淡同雲撥不開歲陽云暮迫星回
寄言大造洪濛裏
速致青腰滕六來

雪

朔風一夕結層陰
竒貨居來更易尋
器異山濤仍玉璞
坐無王衍亦瑤林

雪中有懷舊遊次友人韻

昔泛秦淮一舸飛
角聲吹動塞雲悲
如今獨聽寒窓雪
憶殺梅花舊日詩

陪樞密富公遊雪川即事呈三首

飛樓百尺面巔岼
萬頃谿光帶郭寒
宵寐正求良弼夢
雲山聊得暫時看

龍庭一紀袖攜香磊落功名竹帛光敢請東周重復古
肯同歌鳳接輿狂

杖藜登覽更簪蒿莫學騷人獨舖糟奕世當傳張顥印

三公行佩呂虔刀

疊前韻三首

菁村小隱卜巔岼盟在前峯詎肯寒却把青鞵踏城市

赤欄山色帶慙看

某自菁山起赴州治

青蘋風起遞秋香翠蓋紅粧襯水光暇日躋攀莫辭數

人生百歲似風狂

晚涼湯餅點青蒿
瓠分甘笑楚糟好
摘江籬充雜佩
不須歲晚夢三刀

涌橋道中

雨跳濁水千漚亂
風過橋林萬弩齊
頃刻涌橋斜景在
市人來去兩虹霓

七夕

朱閣瓊宮耀紫房
翠翹下墮慰愁腸
天中感遇非塵世

不念癡牛念郭郎

郭翰

次韻德升七夕二首

盈盈一水截長空
烏雀橋成得暫通
逗曉歸來裝萬恨
舊機牢落響寒風

霓旌鸞扇去央央
雲路輕車駕七香
靈會此宵才瞬息
經年何苦夜偏長

次韻德升頤軒詩五首

晴碾春龍鬪小窻
飲慳難遣睡魔降
翩然夢遶滄洲去

白馬波寒槩一雙

轆轤聲到讀書帷
草解招涼暑氣遲
淨掃竹軒人不到
戍樓哀角又空吹

造物機緘屬小兒
懶從寒燠究端倪
綠陰晝寂孤花淨
猶有黃鸝恰恰啼

金鑿賜第新摹桂
鐵幕官期未及瓜
隱几蒲團無一事
五車關眼未昏花

外物年來論已齊
眼看人事浪推移
襪祥白犢何勞問

寵辱黃梁共一炊

次韻德升惠新茶

寵餉頭綱北焙茶分甘應自五侯家
午鷄驚破槐安夢猶有新香在齒牙

雙疊紅囊貯揀芽旋將活火試瑤花
半生未有陽侯厄喜聽啞啞轉井車

新茶

當日火攻應有法此時水厄定無餘
閒軒七碗宜頻試

九隴清泉勝具區

烹茶

俗耳未容聽滴瀝水瓶聊遣挹泓澄
晴軒小酌煎新茗
紗帽籠頭似管寧

鮒魚

貫以柳條仍撥刺
芼之筠笋佐鮮肥
他年京洛憎凡饌
莫忘河亭染指時

烹笋

味佳端可供羹挾韻勝尤宜薦酒螺自笑癡人饜口腹
不求新竹透林多

友人惠芍藥并青梅一枝偶成三絕

窺園記我分名卉大似梁園重錦紅自媿江淹才已盡
卻須還與主人翁

芳叢的皪長明檻不似餘花頃刻春始信有常能耐久
何須逐巧鬪尖新

香雪一林初著子和枝分餉不吾慳含酸但止文園渴

青瑣無人感遠山

以糟水灌芍藥戲題

年年國艷賞敷腴
醅酏供人就燕胥
此段固應先骨醉
舖糟聊學楚三閭

金邊山畔汁偏美
玉井峯頭船最多
未敢磨刀供大嚼
却愁歲札有修羅

山谷以寒巖子詩十二首作藁書詞筆俱絕裴
繼之出示求跋因題絕句

百篇詩已露玄關欲免驚愚理亦難招得使君來帳下
不應饒舌坐豐干

跋子猷訪戴圖

玉屑金波各眼塵如何牽役不知勤往來擾擾天機亂
那似端居對此君

跋陶淵明歸去來圖

小邑絃歌始數旬迷塗才覺便歸身欲從典午完高節
聊與無懷作外臣

吳道子畫鬼

莫將幽顯較精麤
人鬼從來理不殊
磊砢挈雲傳怪狀
論師天眼識工夫

跋李伯時畫李元通隨虎圖三首

華嚴寶軸掛於菟
笑問翻經有地無
引下福山三十里
不應老馬獨知塗

清樾寒潭土作宮
楊枝柏葉五年中
論成永作將來眼
第一功歸大小空

素幅工傳長者真龍眠端恐是前身只留散帶經行影
不貌供齋兩玉人

跋黃魯直畫

江南黃鶴飛滿野徐熙畫此何為者百年幅紙無所直

公每玩之常在把

原注玉篇鶴鴉也說文鶴鴉奄也一曰牟母一曰鴉呂氏春秋注曰鼠化

駕幽州謂之鶴

畫竹二首

萬箇霜筠保歲寒風枝輕夏玉琅玕何人重作翩翩賦

寫出高標與諦者

眼到竹邊知未是竹來眼裏亦全非諸人問我真如意
不到山前帶笠歸



欽定四庫全書

集部

丹陽集卷二十三

詳校官庶吉士臣張溥

侍讀臣孫球覆勘

謄錄監生臣范維城

欽定四庫全書

丹陽集卷二十三

宋 葛勝仲 撰

詩餘

浣溪紗九首

詠梅

東閣郎官巧寫真西湖處士妙傳神
嫣然一笑臘前春
鬪好雖無冰骨女相宜
幸是雪髯人且煩疎影入清樽

木芍藥三首

可惜隨風回旋飄直須燒燭看嬌嬈人間花月更無妖
濃麗獨將春色殿繁華當合衆芳朝南床應為醉洵
洵

通白輕紅溢萬枝濃香百和透豐肌丹山威鳳勢將飛
玉鏡臺前呈國艷沈香亭北映朝曦如花惟有上皇
妃

鬪鴨欄邊曉露沾華堂醉賞軸珠簾插花人好手纖纖

淹
遮護輕寒施翠幄標題仙品露牙籤詞人遺恨獨江

賞芍藥

樓子包金照眼新香根猶帶廣陵塵翻階不羨掖垣春
不分與花為近侍難甘溱洧贈閒人如羞如怒獨含
顰

少蘊內翰同年寵速日出後堂并製歌詞侑
觴卽席和韻二首

今夜風光戀渚蘋欲教四角出車輪金釵離立座生春
神女恍驚巫峽夢飛瓊原是閨風人詔封後院寵儒

臣

溪岸沈深屢泛蘋傾城容見此推輪可憐虛度二年春
暮暮來時騷客賦朝朝新處後庭人天留花月伴羈

臣

小飲

盤裏明珠芡實香尊前堆雪膾絲長何妨羌管奏伊涼

浪
翠葆重生無復日白波不醕有如江壁間醉墨任淋

贈妓

東道殷勤玉笋飛華燈傾國擁珠璣玉奴嫌瘦玉環肥
縹緲幸聞緱嶺曲參差猶隔夏侯衣放開雲月出清
輝

訴衷情

友人生日

清明寒食景暄妍
花映碧羅天
參差捍撥齊奏豐頰擁
芳筵
逢誕日
揖真仙
託爐烟
朱顏長似頭上花
枝歲
歲年年

減字木蘭花

公弼姪初授官以此勸酒

辛勤場屋未遇知音
甘陸陸詔錄遺忠
一札天書下九重
鷺城初命此去青雲應漸近
解褐恩新今歲吾家
第四人

西江月五首

正月十七日與文中自邑境徧遊歛黯祁門

山水十九日在黟邑洞靈觀夜燕二首

羈宦新來作惡窮途誰肯相從追攀十日水雲中情誼
知君獨重 寂寂回廊小院冥冥微雨尖風鳳山香雪
定應空昨夜疎枝入夢

山鎮紅桃阡陌烟迷綠水人家塵容誤到只驚嗟骨冷
玉堂今夜 莫對佳人錦瑟休辭洞府流霞峯回路轉

亂雲遮歸去空傳圖畫

三月初六日席上代監酒和

晚路交遊綠酒平生志趣青霞霜風時節近黃花泛宅
舟將鷁畫不分兩溪明月夜深只屬漁家今朝清賞
寄情涯肯向榮途索價

叔父慶八十會

瑞獸香雲輕裊華堂繡幕低垂人生七十尚為稀况是
釣璜新歲登俎青梅的礫明欄紅藥芳菲天教耆壽

過期頗常對風光沈醉

與王庭錫登燕集作

清樾已生晝寂孤花尚表春餘象牀筠簟燕堂虛初過
晚天微雨 珪璧新來北苑鱸尊未減東吳捧觴紅袖
透香膚不浥翔龍烟縷

醉花陰

次印師韻

東皇已有來歸耗十里菁山道凍枿萬株梅一夜粧成

似趁鷄鳴早
年時清賞曾同到
先仗遊蜂報
抖擻舊
心情一笑
酌春不羨和羹詔

瑞鷓鴣

工部七月一日生辰

火雲欲避金風至
秀氣充閭初降瑞
去家丁令却歸來
還燕懸弧當日地
金章紫綬身榮貴
壽福天儲昌又
熾怪來一歲四遷官
還遇當生元太歲

浪淘沙四首

十月十九夜賞菊

我愛菊花枝
浥露偏宜旋
移佳種一年期
照眼黃金三
徑爛可但東籬
秋老摘花吹
敢恨開遲只愁
一夜便香衰
待插滿頭年大
也且泛芳卮

九月十八日與千里賞菊三首

又見菊枝新
色淺香勻
老人衰病卧
漳濱雖是無
聊仍置酒幸
有嘉賓不用
怨蕭辰不似
芳春請看金
藥照金樽
今夜花前
須醉倒直到
黎明

歌闕鬪清新檀板初勻畫堂新築太湖濱好是黃花開
應候聊宴新賓 上客即逢辰況是青春上林開宴錫
堯尊今夜素娥真解事偏向人明

娛老子亭新丹堊初勻萬株金菊遶溪濱折向華堂遮
醉眼聊用娛賓 紅燭夜將辰廣座生春月波新釀入
芳樽好向花前拚爛醉不負承明

鷓鴣天五首

賞菊二首

黃菊鮮鮮帶露濃
小園開徧度春風
自筍玉醴酌秋色
旋洗霜須對曉叢
香在手莫忽忽尋芳
今夜有人同
黃金委地新收得
莫道山翁到底窮

采采黃花鵲彩濃
吹開一夜為霜風
已邀騷客陶元亮
不用歌姬盛小叢
秋易老莫忽忽齊山
高興古今同
欲知此地花多少
一眼金英望不窮

九月十三日攜家遊真意亭燕集二首

婆律香濃氣味佳
玻璃仙盃進流霞
凝香清滌高陽醉

靈液甘和正焙芽
香染指浪浮花
加邊禮盡客還家
貫珠聲斷紅裳散
踏影人歸素月斜

小榭幽園翠箔垂
雲輕日薄淡秋暉
菊英露浥淵明徑
藕葉風摧叔寶池
酌素景泥芳卮
老人痴鈍強伸箸
懽娛莫遣笙歌散
歸路從教燈火稀

新春

玉琯還飛換歲灰
定山新棹酒船回
年時梁燕雙雙在
肯為人愁便不來
衰意緒病情懷
玉山今夜為誰頽

年時梅蕊垂垂破肯為人愁便不開

木蘭花

盧姊生辰

談圍曾蔽青綾帳林下中年敦素尚烟波偶趁一帆風
却鎖雲扃來就養自從悟得空無相身把虛空來作
樣大千沙界抹為塵未比無生真壽量

鵲橋仙二首

七夕

涼颼破暑清歌縈坐缺月稀星庭戶瓜華草草具杯盤
喜共浥初筵零露天孫東處牽牛西望勸汝一杯清
醕精靈何必待秋通為一洗朦朧今古

闕

偶天津輕渡却笑姮娥孤皎平時五夜似經年問何事
今宵便曉雲車將駕神夫留戀更吐心期多少支機
休浪與閒人莫倚賴芳心素巧

南鄉子四首

三月望日與文中諸賢泛舟南溪作

柳岸正飛綿，選勝輕遊漾。碧連笑語忘懷機，事盡鷗邊。
萬頃溪光上下天，孤草久延緣。不覺遙峯靄暮烟，對
酒莫嫌紅粉陋。嬋娟自有孤高月姊仙。

九日

拂檻曉雲鮮，銷暑樓危竦。半天曾是攜賓當，薦九開筵。
度水縈山奏筦絃，黃菊映華顛。千騎重來已六年，樓
下東流當日水依然。更對周旋舊七賢。

九日用玉局翁韻作呈座上諸公

晴日亂雲收人在蘋香柳暉洲溪上清風樓上醉颼颼
共折黃花插滿頭 佳客獻還酌不負山城九日秋
碧荇青供醕酌休休楚客當年浪自愁

九日黃剛定再索席間作

秋水滢精神靖節先生太逼真談塵生風霏玉屑津津
爽氣泠然欲侵人 一座盡生春滿引瓊觴已半醺更
把黃花壽彭祖

原注事出魏文帝書

盈盈數闋新聲又過雲

虞美人四首

酬衛卿弟見贈二首

三年曾不窺園樹辛苦螢窓暮怪來文譽滿清時柿葉
書殘猶自日臨池 春秋新學早繁露黃卷聊堪語家
人不用寄歸詩行看昇平樓外化龍歸

一輪丹桂窅空樹光景疑非暮天公作意在茲時掃盡
微雲點綴展清池 樽前金奏無晨露只有君房語驪
駒客莫賦歸詩東道留連應賦不庸歸

原注一作共踏
青槐碎影夜闌

歸

題靈山廣瑞禪院

靈山法會何曾散此地神光滿
丁公潭下百雷霆疑是
銀河挽下一齊傾
高橋飛觀連雲起
檻外驚湍水大
磯才過小磯來應有天孫靈
馭月中迴

自蘭陵歸冬夜飲嚴州酒作

嚴陵灘畔香醪好遮莫東方曉
春風盍盍入寒肌人道
霜濃臘月我還疑
紅爐火熱香圍坐
梅蕊迎春破一
聲清唱解人頤人道
牢愁千斛我誰知

臨江仙九首

上巳日遊海昌王氏園呈吳宰做及中散兄
倦客身同舟不繫輕帆來訪癯仙春宵元已艷陽天天
桃方散錦高柳欲飛綿 千古海昌佳絕地雙鳧暫此
留連通宵娛客破芳樽蘭亭修禊事梓澤醉名園

燕諸部使者二首

自古吳興稱冷僻菰城水浸潏潏田星難望使車塵如
何三日飲併有五行人 文似枚臯加敏速記書易若

張巡幕中無用却嘉賓他年浮棗會莫忘兩溪春

千古烏程新釀美玉觴風過潏潏歌聲未辨起梁塵九
天扶侍客來作繡衣人 夙有詞華驚一覽傳聞獻頌
東巡未應握節久賓賓一封馳詔旨却醉上林春

與葉少蘊夢得上已遊法華山九曲池流杯

小樣洪河分九曲飛泉環遶潏潏青蓮往事已成塵羽
觴浮玉斝寶劍捧金人 綠綺且依流水調蓬蓬醕鼓
催巡玉堂詞客是佳賓茂林脩竹地大勝永和春

嘲尉姜補之託疾卧家

郊外黃埃端可厭，歸來移病香閨象床珍。簟共委蛇者
婆尋草盡，天女散花遲。小雨作寒秋意晚，簷聲與夢
相宜冷。侵羅幌，酒烟微試評書五朶，何似畫雙螭。

席上和呈中散兄及吳令三月初六日

寶觀峇堯飛雉堞，登臨恍欲升仙野。桃官柳襯吳天春
風寒，食夜遺恨在封綿。聞道東溟才二里，銀濤直與
天連。憑誰都卷入芳尊賦，歸歡靖節消渴解文園。

章園賞瑞香二首

二月風光濃似酒，小樓新濕青紅碧。
琉璃色映羣峰更，移金鑿落來賞錦薰籠。
詞客舊留月旦，此花清軟纖穠。
未饒蘭蕙轉光風，赤欄呈雅艷。
翠幕護芳叢。

雪壁歌詞題尚濕，春風又見輕紅一枝斜。
挿映頭峰不辭連，夜賞銀燭透紗籠。
白髮欺人今老矣，樽前羞見繁穠。
清香尤嫵，虎溪風海棠，須避席佳種。
謾蠶叢。

二月二十二日錦薰閣賞花詞

檻外竒葩江外種
嬌春未減輕紅
畫樓晴日斂雲峯
佛香來海岬
蜀錦薦燈籠
今夜那憂殺
風景酒花來闕
妖濃江梅冷淡
避春風
明年來縱賞
應醉綺羅叢

定風波二首

與葉少蘊陳經仲彥文燕駱駝橋二首

千疊雲山萬里流
坐中碧落與鰲頭
真意見娛吾已領
烟景不辭捧詔久汀洲
老去一官真是漫
溪岸獨餘
此興未能收
留與吳兒傳勝事
長記赤欄橋上攬清秋

共喜新涼大火流一聲水調聽歌頭況有修娥蕪粉領
佳景謝公元不礙滄洲平昔短髮真太慢氣岸老來
都向酒杯收雲水光中修禊事猶記轉頭不覺已三秋

蝶戀花八首

春夜即事二首

二月春遊須爛漫秉燭看花只為晨曦短高舉蠟薪通
夕看紅光萬丈騰天半寄語平時遊冶伴不負分陰
勝事輸今段燈火休催歸水院慙慙更照桃花面

只恐夜深花睡去，火照紅粧滿意留。賓住鳳燭千枝花，
四顧消愁更待尋何處。漢苑紅光非浪語，棲靜庭前
都是珊瑚樹。便請催斟鳴鼔，明朝風惡飄紅雨。

疊前韻二首

百紫千紅今爛漫，舉燭輝花莫厭燒。令短酒裏逢花須
細看，人生誰是英雄半。安得紅顏為老伴，妙舞花前
楊柳誇身段。已倒玉山迴竹院，清香不斷風吹面。

已過春分春欲去，千炬花間作意留。春住一曲清歌無

誤顧遠梁餘韻歸何處 盡日勸春春不語紅氣蒸霞
且看桃千樹才子霏談更五鼓剩看走筆揮風雨

和王廉訪

風過漣漪紋縠細十拍香檀驚破文禽睡野蕪溪毛真
易致風流未減蘭亭會 擊汰千艘供洛襖映水垂楊
萬縷拖濃翠小海一聲波上戲態慙留客千金意

同安生日二首

雨後春光濃似醉着柳催花節物侵龍忌繡襦香闥當

日瑞紫蘭宮墮人間世
歌管停雲香吐穉碧酒紅裳
共祝魚軒貴天上阿環金籙秘龜齡
共樂堂深簾不捲惻惻寒輕二月春猶淺續壽競來歌
舞院龍涎香襯鰕綃段
畫棟朝飛雙語燕端似知人
著意窺金醖柳外花前同祝願
朱顏長在年齒遠

章道祖生日

安石榴花濃綠映解愠風輕政是朱明令
衮繡元臣門
戶盛童孫此日懸弧慶
夜燕華堂添酒興黃紙除書

遠帶天香賸欲挹
芑波供續命不須龍護江心鏡

漁家傲

初創真意亭於南溪遊陟晚歸作二首

崑壑縈回雲水窟
林深路斷迷煙客
茅屋數椽攜杖舄
人寂寂
侵簷萬箇琅玕碧
倦客羈懷清似滌
更無一點飛埃迹
溪漲慢流過几席
寒湜湜
鳧鷖點破琉璃色
疊疊雲山供四顧
薄書忙裏偷閒去
心遠地偏陶令趣
登覽處
清幽疑是斜川路
野菽溪毛供飲具
此身甘

被煙霞痼興盡碧雲催日暮
招晚渡遙遙一葉隨鷗鷺
江城子

和無言雪詞

飛身疑到廣寒宮
玉花中興何窮
酒貴旗亭誰是惜青
銅飄瞥三吳真妙絕
銀萬里失西東
華堂紅蠟煖歌
鐘卷簾風賞空濛
豐頰修眉鶴鬢擁
仙翁欲作艷
餽花
底客清漏永禁城重

驀山溪三首

送李彥時

出門西笑千里長安道不用引離聲便登榮十洲三島
畫船珠箔蘋末水風涼隋岸柳楚臺人景與人俱好
應憐見晚玉殿生清曉正是妙年時步承明謀身須早
軺車膚使新遂凱歌回恩綉重綵衣輕嘉慶知多少

穿天節和朱刑掾二首

望雲門外油壁如流水空卷逐朱轡步春風香河七里
冶容炫服摸石道宜男穿翠靄度飛橋影在清漪裏

秦頭楚尾千古風流地試問漢江邊有解珮行雲舊事
主人是客一笑強頌春燒燈後賞花前遙憶年年醉
春風野外卵色天如水魚戲舞綃紋似出聽新聲北里
追風駿足千騎卷高岡一箭過萬人呼鴈落寒空裏
天穿過了此日穿名地摸石俯清波競追隨新年樂事
誰哀老子使得暫遨遊爭捧腹乍憑肩夾道遊人醉

滿庭芳

任昉嘗為新安太守風流名迹圖經史牒具

載感今懷古作

百不為多一不為少阿誰昔仕吾邦共推任筆洪鼎力
能扛不為桃花祿米讎書倦一葦橫江招尋處徒行曳
杖曾不擁麾幢山川真大好魚磯無恙密嶺難雙聽
訟訴多就樵塢僧窻歲月音容遠矣風流在遐想心降
雲煙路搜竒弔古時為酌空缸

原跋二首

文康葛公文章粹雅夙絕當世士夫仰之儼如山斗

凡所著作流布於人間者孰不珍藏而喜讀之曩者
洪君出守儀真固嘗鏤板以惠學者比以兵火蹂踐
散失殆過其半曉不忍斯文之墜因學糧之餘搜訪
舊本命工補闕庶可傳之永久在曉雖不能繼三篋
之美譽而亦可以足四部之藏也歟隆興癸未仲夏
甲寅日右朝請大夫知真州軍州主管學事兼管內
勸農營田事宋曉題

葛文康公以文章名世世之名能文者舉推尊之信

邁之綸闡與公之孫給事郊游從容論議得公平生
為多公妙齡擢上第以三經試學官應博學宏詞科
俱第一徽宗幸太學時以賦頌奏御者千餘篇詔近
臣第之以公為首於是譽益重雖然茲公餘事爾公
為大司成數言時政得失忤貴要意褫職奉祠處之
晏如也起知湖州過京師以書抵當路勸毋北舉其
言有曰天下無事則宰相安宰相生事則天下危以
今觀之識見過人遠甚豈特古所謂綴文之士哉有

丹陽集傳於世儀真舊嘗鋟板經兵火不全姚君恪
為守復刊之屬余識歲月因筆一二以發幽光之緒
餘使後進得以窺前輩之學姚君本書生累與賓薦
雖登武爵凡事能潤飾類此淳熙十三年七月初一
日朝奉大夫試中書舍人兼脩玉牒官王信跋

欽定四庫全書

丹陽集卷二十四

附錄

宋左宣奉大夫顯謨閣待制致仕贈特進謚文
康葛公行狀

曾祖惟甫故贈吏部尚書曾祖母吳氏贈
陳留郡太君

祖密故任承議郎致仕贈通議大夫祖母

陳氏胡氏皆碩人

父書思故任朝奉郎致仕贈少師謚清孝

母侍其氏贈秦國夫人

公諱勝仲字魯卿其先嬴姓夏后世封國於葛春秋時
嘗見於經其後子孫因以為氏漢魏之世著籍廣陵唐
天祐中有諱濤者避孫楊連兵之禍徙江陰家焉其子
彪太宗時以高年有德賜爵公士生詳隱居不任於公
為高祖娶焦氏是生尚書至通議清孝皆以進士擢第

通議早歲歸休為鄉人所宗而清孝居官奉親清德孝行著聞既卒邑狀其事諭於州州聞於朝詔特賜謚清孝公幼警敏日誦書數千言九歲能屬文初清孝篤志孝養未暇為公擇師一日公白清孝曰某人不足以為某師清孝駭問其故公徐於袖中出文藁清孝遽取視則語盡驚人而師所竄定皆非是迺笑而領之遂為公易師清孝嘗與客論文偶有遺忘召公問之酌答如響一座嘆異自是賓朋會集必使公侍左右年十五而學

成於經史無不精通年十六應開封舉中其選年十九
丁內艱二十二再試開封為第四主文歐陽叔弼見其封
建策愛歎之紹聖三年復預開封優選明年試南宮時
再用經義取士知舉文節林公希謂公邃於經旨乃擢
寘高等遂登是歲進士第朝廷方興律學公居學纔閱
月於法令貫通若素習試為第一國子監上其程文乞
旌擢以勵衆元符二年調杭州右司理參軍杭為浙右
都會民俗繁夥多鬪訟狴犴往往充斥而吏皆大姦宿

賊舞文市獄無所顧忌公自以儒生且年少恐其易已
乃痛繩以法而於鞫獄必委曲詳盡囚感公哀矜咸吐
情無隱旬月間滯獄一空吏益畏憚不敢肆皇祐中有
司理某者以院吏名次高下立為定格每視役之劇易
悉以序授任循用既久吏持必其上莫有懲勸事多不
集公暇日取其格視之謂羣吏曰此非若衙規有成法
不可動顧前官可為吾何為不可改索火焚棄不用衆
皆誨公屹不變遂一以能否勤惰為升降而任劇易於

是人人競奮事無不理府帥豐稷知公為一代偉人累薦於朝事皆倚公而辦先是福州有士族不肖子因醉酒與其徒凡三人出郊偶見巨商行支徑隱關征者即詐為捕稅吏執之商窘甚以賂得釋已而病死其家乃以遇劫盜聞於官獲其二即抵法獨逸其一跡捕至杭得之繫州獄前官以其黨既伏誅謂是囚亦當死無疑鍛鍊成之獄具未決公至得其情曲折移牒福州請收商家詰問果辭窮自言實誣告遂直其冤赦皆服公之

精明文節公赴召京師陰求天下奇士一見公謂曰君
文詞經術宜為當今模範獄訟冗職柰何久居因薦試
學官元符三年春公以詩書禮三經試於有司又試宏
詞二科俱為第一特遷河中府知錄參軍改登侍郎士
林歆艷見其文以為不可及公之華問自是彌大矣建
中靖國元年除兗州州學教授究故先聖國師儒之任
朝廷不輕畀以公有重名特命焉公居職益自勵日與
生徒談經論文孜孜不倦人得所未聞心咸悅服鼓箏

踵堂者輻輳至黌舍弗能容公乃移書部使者丐錢悉
撤其舊擴而新之且豐其餼廩學校之盛遂冠一路崇
寧二年始行三舍法於天下朝廷以太學首善之地故
除授學官非第一流人不在選除公學正清孝喜謂公
曰士積學非獨為己蓋將淑諸人汝其勉旃清孝自謝
事高卧未嘗出閭門公因力請迎養從之公官卑祿薄
且處桂玉之地日營滫瀡之奉極其誠至崇寧三年八
月以薦者遷文林郎是歲天子幸太學公奏賦數千言

時四方文儒之士上歌頌文章者以千計徽宗皇帝命
中書省第其優劣公居其首十一月丁外艱執喪哀毀
過制既舉大事貧甚無以贍其孥至全家食粥終喪未
嘗飲酒茹葷居苦廬閱釋氏所謂大藏經者盡其卷帙
大觀元年五月用幸學恩循承直郎差充提舉議歷所
檢討官是冬天子祀南郊文武官通朝籍者例皆得封
贈公以檢討在職若滿半歲則於格當改奉議郎預計
其日適在歲事之後乃拜章乞減秩一等及大禮前授

命朝廷嘉其孝特改通直郎由是恩霑泉壤鄉里榮之
八月除知大宗正丞事檢討如故始朝廷以從臣提舉
議歷所至是俾郭天信代之公深惡其人弗欲與共事
謂之曰是局既易長則其屬義亦不可留堅請引退天
信曰公譽望如此豈久為檢討官者苟能暫屈相從正
字指日可得公曰富貴在天儒者但當顧義耳明日抗
論於朝力丐罷天信聞之大怒公請不已併乞罷宗正
職上喜其不可奪特許罷歷局搢紳稱其難能二年以

皇帝受八寶恩轉奉議郎仍加武騎尉宗室仲臻妄議
學制公劾之上喜公能舉職特轉承議郎三月除秘書
省校書郎五月遷尚書考功員外郎以親嫌改禮部員
外郎時方承平四方上符瑞者邈至公掌南宮牋奏或
日草數牘曾無滯思時人服其敏而工三年六月磨勘
轉朝奉郎八月以議廟制與時論不合責知歙州休寧
縣歛地多巖嶮其民狠愎健訟歲斷大辟以百計在江
東號寢難治而休寧尤甚故諺稱鑊湯滾處銓曹選注

無顧往者攝官歲久弊滋甚益不可為公初至命吏於
大辟中恣取其一旦親決吏選久可疑者案牘數千紙
俾兩人舁至欲因以困公公閱視不移晷呼獄吏曰於
若干紙外亡去一節是必汝所匿吏駭汗失措度不可
隱迺於其舍故牘中出之果皆中款情要吏叩頭曰囚
罪本不至死某故當以死其所匿一節乃囚自白明甚
懼令平反故匿之公引囚覆問皆合因釋囚而正吏罪
一邑以為神明曾未踰月因圖告虛公之始謫也衆皆

謂公必不行既至又謂公必不事事及見公視職甚謹
雖細務檢飭必親簿書錢穀悉井井有條次無絲忽不
治然後歎公之才有餘而度量宏遠也每聽訟必先為
民辨曲直已乃從容告以慈孝禮遜之節恂恂然猶父
兄之詔子弟民多在庭中感泣願息所爭由是獷俗頓
革鬪訟衰止暇日攜賓友登覽泉石吟咏酌唱畧無遷
謫之歎考課為江東第一外臺列薦諸朝政和元年磨
勘轉朝散郎加雲騎尉三年復召為禮部員外郎以預

議元圭轉朝請郎未幾遷吏部員外郎四年擢國子司業時興學久成均之士為文轉相模倣率一律公恐其漸入卑陋每考試必取卓然不羣者置之上列文格翕然大變士相慶以為得師質經叩疑者屢滿戶外幾無食息之間其為當世推重如此朝廷命諸生習雅樂樂成上御崇政殿按試大悅學官皆增秩一列轉朝奉大夫七月以公在吏部編脩大使臣名籍成轉朝散大夫九月遷太常少卿皇朝自建隆至治平初所行典禮歐

陽文忠公嘗裒集判定為書凡百篇號太常因革禮及
是朝廷以公明習典章俾續其書公自治平迄政和四
年用文忠公條目纂錄為三百卷於是五十年間禮文
之事粲然在目書成上覽而嘉之使與前書併藏太常
焉五年初建太子府以公兼太子右諭德公每見太子
未嘗不言治心修身之要且以仁孝學三言各著一論
獻之勉之使進於是大蒙嘉納復採春秋戰國以來歷
代太子善惡成敗之迹日進數事既久遂成一書號承

華詔媿云九月磨勘轉朝請大夫六年七月移太府少
卿時盛章以諂媚權貴驟用為開府尹勢傾中外忽遣
其子并謂公曰外府左遷士論甚鬱某能為公即還舊
物其許之乎公正色曰進退百官當自宰相某雖不佞
顧安肯由他岐進以重速戾哉并歸以告章太慙遂與
公為仇讖者聞而避之除國子祭酒七年遷大司成以
前任司業訓導高麗生有勞轉朝議大夫公慨然語家
人曰吾自布衣致身侍從受國厚恩當圖報効前此位

早不敢越職論事今豈宜緘默乃數求對言天下治亂
大計且陳時政得失雖歸削藁不以示人然貴要咸怒
切齒公由是不能自安於朝矣俄落職提舉江州太平
觀宣和元年朝廷明公非辜復右文殿脩撰仍改宮觀
作自陳繼除知汝州國初京西多曠土寶元康定間特
輕其賦募民墾闢歲久地無遺利而民益富饒政和初
言利者始獻議增稅民已不能支其後宦官李彥為京
西之民率盜占官地括其田而歸之官號西城新法由

是破產者比屋有朝為豪姓而暮乞丐於市者公下車
數月會彥至一境騷然苛暴肆行人多逃匿以避禍公
見彥垂泣曰某任郡寄當為天子牧養斯民而坐視其
離散如此深所不忍願公稍霽威嚴退而條具不當括
者數千戶請蠲之彥大怒曰是欲沮壞西城新法耶草
奏劾公朝廷壯公敢為寢其奏不行自茲西城及貢奉
之事專委通判而彥亦不復再至州境矣二年磨勘轉
中奉大夫加丹陽縣開國男大河歲脩掃岸費稍草不

貨皆取辦旁郡而汝獨倍民大困不堪命公喟然嘆息
上疏乞免且令民緩輸待命轉運使怒不及期符檄督
迫日峻公奏免益急僚屬惶怖不知所為公慰撫之曰
諸君第勿書紙尾某當獨任其責頃之詔允積年重斂
一朝而除民叫謹文賀家家畫公像歲時率子孫環拜
相語曰微葛公吾儕非餓死即流徙異鄉能復自保於
此乎前太守常建言汝州崆峒山實黃帝問道之所宜
築宮奉廣成子既得請則竭力以事土木工未究罷去

及公至主觀道士出大言脅公促繼前役公叱之曰歲
饑民匱可困以不急乎即上疏乞須豐登有旨特從公
之內剛不畏彊禦多此類三年復顯謨閣待制四年四
月磨勘轉中大夫七月轉太中大夫徙知湖州是行實
過闕例得入覲時親黨當國將為燕山之舉公先以書
遺之其畧曰方今東南靖息西北歡盟相公之功業可
謂大矣然天下無事則宰相安宰相生事則天下危願
相公享宰相之安而無使天下危也省書不悅乃畫旨

令便道之任公之未至湖已聞有黠吏數輩持郡將短
長肆為不法及視事數日盡得其姦賦流放之闔郡稱
快燕山之役既興國用益屈乃科免夫錢於天下輸後
期者俾以軍法從事民大驚懼時浙西連歲水潦公持
檄憂形於色顧其佐曰方茲艱食何堪重斂議減其半
衆爭諫以為不可公曰苟利於民死非所憚卒奏減之
前此浙寇方臘起青溪既破睦陷杭湖與杭接壤無賴
輩乘時相劫掠州縣兵單弱弗能禁乃便宜使土豪捕

擊有愚民無知因平昔纖芥遂誣其隣以叛逆殺數人及事平鄰家訟寃有司推治連蔓不已因以求貨無辜逮繫者百餘家前二千石踰年不能決公究問則其首二三人皆瘐死久矣即日決遣之歡騰市里宣和六年移知鄧州公之在湖朱勔嘗求鸚鵡白雀之屬公拒之甚峻勔銜公入骨由是橫加媒孽遂落職提舉江州太平觀七年加開國子靖康元年以淵聖皇帝即位覃恩轉通議大夫冬公寓平江敵人再攻東都圍甚堅四方

音問莫通公憂懣殆廢寢食旋聞二帝北狩西嚮號慟
白郡守曰公當帥師勤王又曰元帥在濟南以表勸進
不可緩因呼左右索紙筆立草數百言俾守即遣官持
詣元帥府詞旨懇切讀者流涕及上即阼一時人士皆
爭為攀附計而公未嘗一語及之建炎元年覃恩轉通
奉大夫四年復集英殿脩撰再知湖州自庚戌歲敵人
蹂江浙後盜賊蠡起破州縣殺官吏人情恟恟朝不謀
夕公於是邦遺愛素著民見公復來歡迎蔽路會劇賊

邵青大緝舟楫欲由江路入太湖窺伺湖州聲勢甚張公乃繕城郭蒐卒乘作水戰艦數百艘以綵幟別其隊伍教之陣法日親閱試而加賞罰士皆精勇可用又命郊外團堡社明斥堠以堅防守民恃以不恐時高彥張琦復相繼擁兵入安吉長興界公遣其屬李咸統兵與之力戰獲首級甚衆賊鋒既挫且聞有備一夕而遁邵青亦望風引去有頃孫誠於烏墩鎮殺傷官吏居民散走公亟遣單騎諭以禍福恩信賊徒乃相戒曰葛使君

至誠吾儕聞之舊矣即投戈就降安吉頑民施四九見
羣寇游至郡境因起為盜旬日間嘯聚千衆隣邦皆震
恐公選將校之驍勇者俾統兵授以方略直搗其巢遂
生擒誅之餘衆奔潰皆縱不問將吏請奏功曰捕盜守
臣職也何功之有終不自言是歲大饑米價翔貴一斛
踰萬錢餓殍相枕藉公既發官廩又輸己穀數百斛遣
官吏賑給右姓見公憂勞惻怛復爭出穀為助傍郡之
飢者聞公荒政咸襁負而來至無以容乃自城邑及郊

野命闢僧舍若亭驛以處之薪金管藉之屬無一不備
蒙全活者不可勝計建炎初梁端守是州嘗獲謀叛軍
人童照并其黨數十人被加職之褒告者張成沈賓皆
命官人咸慕之至是復有將校告其營卒有謀叛語意
公必樂聞而已因受上賞公夜半披衣集官吏訊治則
營卒醉卧猶未醒公知其誣告笑曰吾豈肯殺無罪而
利己乎遂錄付獄果無迹狀因坐誣告者徙之旁郡有
劉惇者自稱明節皇后弟官承宣使所至郡府皆接以

禮盜請俸錢積數百萬公一見與之言覺其詐即加收
治一問而服乃開封捕盜使臣也紹興元年六月轉左
正議大夫冬復顯謨閣待制提舉亳州明道宮公在郡
留心庶政事雖甚微亦不輕委其屬視其民如恐傷之
有利立行有害立去邦人愛公如父母出境之日民挽
車號泣祖送數十里不絕至今言及公猶以手加額頌
歎不已五年加開國伯七年加開國侯九年磨勳轉左
正奉大夫十三年加開國公食邑自三百戶累封至二

千戶實封一百戶公官京師二十年徧歷華貫而在太
學之日為多自學正以及長貳皆天子親擢每歲禮闈
試貢士必使公預方是時羣試者幾萬人公考其文於
數句中輒知其學之淺深是以多得天下奇士於書無
所不讀一過目則終身不忘研窮經旨雖通顯猶不輟
祁寒隆暑手不廢卷議論常出諸儒意表學子得其說
爭抄錄藏去其誨人則必先德行而後詞章故諸生皆
知自重而耻麗於罰每薦士必觀其器識而後刻奏其

所推引位輔弼禁從臺閣者比比相望天下論知人必以公為稱首其為文汪洋雄健而復精深醇密衆製各自有體大抵悉極其妙所謂不煩繩削而自合者也於紀事尤不苟凡子之葬其親非得公文識墓則必歎然其為詩清麗有句法與賓客登臨宴賞即席援筆立成文不加點坐者莫不驚異嗟服公在孕時其母夫人夢鳳凰集於庭已而生公人知其為文字之祥及中兩科歸清孝公又夢歐陽文忠公授公以巨硯自茲公文益

進遂以文章名海內夫豈偶然也哉公為人開蕩而樂
易遇物盡誠勇於義若嗜慾不靳財費賙人之急惟恐
不及從弟濟仲貧甚以郊恩官之先其子族女之孤不
能自存者則為具奩橐選壻歸之江陰歲租悉推以畀
同產其仕於杭充也得俸不敢輕用一毫非衣糲食寸
積銖累以嫁二妹早年與長兄司成俱仕輦轂飲食燕
游須臾不暫捨宣和辛丑歲司成不幸而公方守汝陽
為位哭之盡期而撤復推已俸贍其孤晚與仲兄工部

居故里公築堂山水佳處名以二老且日致珍異甘饍
為奉探其志而先之其友悌蓋出於天性鄉閭慕而化
之居官清慎所至必增市估之直敕家人非飲食日用
之物不得輒市於民雖游宦四方而不知其土地所產
於竒器異物珍玩之具一無所好臨事敢為不畏禍患
以白黑太分屢為權倖所中雖數齟齬處之恬然或問
其故公曰吾道固當如是又何悔四為二千石綽有古
循吏之風御僕妾亦以恩禮未嘗妄加鞭箠有不當意

者以微言愧之而已自稱為湖州適時多艱疲於應接
慨然有退休之志既遂奉祠之請乃築室寶溪之上山
水環湊名人魁士杖策造門公為之賦詩飲酒樂而不
厭客去則觀書著文優游間適凡十有四年與子孫講
論文藝朝夕不置閨門之內弦誦相聞彬彬若庠序然
有文集八十卷外集二十卷又取諸史考證異同發摘
秘隱褒善貶惡皆古今名賢所未到者別成一書號考
古通論合若干卷尤喜釋氏書謂與吾儒同道究其奧

昔每宴坐凝然終日或至夜分不寐易簣之夕數聞異
香索水盥手合爪掌跏趺端坐久之乃北首右脅而卧
薨於正寢合夫釋典所為如來涅槃相者享年七十有
三時紹興十四年九月八日也初公屬疾命左右上章
告老詔以左宣奉大夫致仕及遺表上詔又贈特進既
捐館吳興之民雖居深山窮谷中聞者莫不泣下此豈
有以彊之然哉蓋其感於中者深也公之夫人張氏金
紫光祿大夫磐之女而禮部侍郎滢之妹有賢行先公

二十年卒葬於江陰軍由里山之原諸孤以十五年九月壬申奉公之喪合葬焉明年太常考功以公之行治言於朝曰道德博聞曰文安樂撫民曰康宜賜謚文康詔從之於是人士益推為終始哀榮者嗚呼公之仕則遇昌時而位三品退則能自適而享壽考生則為大儒而見宗當世沒則有易名以發揚潛德亦可以無憾矣然人猶以為恨者以公之所蘊者甚厚而所施者纔一二也子六人長曰立方左朝奉郎行祕書省校書郎兼

提舉祕書省編定書籍官兼吳王益王府教授兼權尚書考功員外郎登紹興八年進士科次曰立中右迪功郎提舉河北鹽香司幹辦公事嘗試開封為第五而立罷立卓立豫立參皆早世女三人長適左朝請大夫主管台州崇道觀許暘前卒次適左承務郎監登聞鼓院劉封次適左奉議郎權通判紹興軍府事章侗孫男五人長曰邾右迪功郎臨安府於潛縣主簿次曰邾右承奉郎知建康府溧水縣丞次曰邾左承事郎新太平州

州學教授紹興十八年中進士甲科次曰鄰右承奉郎
臨安府鹽官縣丞後公三年卒次曰邗右承務郎孫女
五人長適右修職郎監台州支鹽倉沈洵次適右迪功
郎章湜次適左奉議郎主管台州崇道觀張本餘未嫁
曾孫一人曾孫女三人惟公始為吳興侗時方冠拜公
於稠人中一見蒙器遇遂歸以季女獲從公遊二十餘
年故知公出處大節為最詳謹叙其事泣以授公子立
方將求名世之士篤古而達於詞者表公之墓云壻左

奉議郎權通判紹興軍府主管學事章侂狀

故左宣奉大夫顯謨閣待制贈特進葛公謚議
議曰先聖以文學政事析為二科博史以藝文刑法各
成一志以見才德充備兼而有之者為難故特進葛公
經術政體兼而有之者也公自髫髻能自擇師通經業
文新然有立未冠試有司以經義中高第再試學官詞
科俱為第一師表成均文體始變逮今粹然一出於正
者實公啟之若續因革禮於曲臺著承華書於春坊皆

稽古禮文治心修身之要茲邃於經術者能之試吏臨
安鋒芒已露讞議刑辟則直死囚之寃欽擿疑牘則正
姦吏之罪若乃立朝大節則見於敷陳時政歸必削橐
力拒要人恥以倖進卻西城括田之役釋青溪株連之
獄再臨吳興治如其初晚奉外祠忠不忘君主上龍飛
嘗草勸進書以授郡將讀者感泣茲達於政體者能之
謹按謚法道德博聞曰文安樂撫民曰康公以經學淵
源致位通顯詞章一出傳寫成誦非道德博聞乎練達

正經剛柔相濟所居有績去必見思非安樂撫民乎具
茲二美宜有大名以傳不朽伏請謚曰文康謹議左承
議郎行太常博士賜緋魚袋蔡宰撰

故左宣奉大夫顯謨閣待制贈特進葛公謚文

康履議

議曰文者貫道之器不通乎道而區區刻意於締章繪
句之間則遇事而失其所守臨民而不知所愛況於權
豪患難相逢於得喪之地而能表見特立推其長雄不

汚寵利蓋亦鮮矣此後世博雅之士考儒林之全節而
弔其不終未嘗不廢書而歎也故特進葛公詞場藝苑
俱以文鳴學館儒宮號為師表訂曲臺之縟禮賦郊陞
之多祥秀句竒辭間見層出高文大冊追古耀今至於
奉詔治民承流宣化推姦汝水若張敞之治京兆遺愛
吳興類朱邑之葬桐鄉俾前世謏聞曲學而素節靡然
者亦可聞風少媿矣傳曰不侮鰥寡不畏彊禦公足以
當之宜錫美名以為儒林之寵文康之謚僉以為宜請

從初議謹議左朝請大夫監尚書六部門兼權尚書考
功員外郎張頡撰



